



Samþykkt um hundahald í Sveitarfélaginu Skagaströnd

1. gr.

Almenn ákvæði

Hundahald í Sveitarfélaginu Skagaströnd sætir þeim takmörkunum sem kveðið er á um í samþykkt þessari.

2. gr.

Skráningarskylda.

Skylt er að skrá hund á skrifstofu sveitarfélagsins á þar til gerðum eyðublöðum eigi síðar en mánuði eftir að hann er tekinn á heimili og hvolpa eigi síðar en þeir verða sex mánaða gamlir. Mynd af hundinum og vottorð um að hundur hafi verið ormhreinsaður skulu fylgja umsókn um skráningu. Sveitarstjórn er heimilt að ákveða að hundar skuli örmerktir.

- Sveitarstjórn er heimilt að veita einstaklingum búsettum í hreppnum leyfi til hundahalds með eftirfarandi skilyrðum :
- Leyfi er bundið við nafn og heimilisfang lögráða einstaklings og er óheimilt að framselja það.
- Hundurinn skal skráður á nafn og heimilisfang lögráða einstaklings, og fær eigandi hundsins afhenta merкта plötu með númeri hundsins, sem jafnan skal vera í ól um háls hans. Hvolpa skal skrá eigi síðar en þeir verða sex mánaða gamlir.
- Dveljist hundur tímabundið í sveitarfélaginu skal skrá hann til bráðarbirgða, en slík skráning skal ekki gilda lengur en í 6 mánuði.
- Hundurinn skal aldrei ganga laus á almannafæri, heldur vera í taumi í fylgd með aðila, sem hefur fullt vald yfir honum. Á almannafæri er hundaeiganda skylt að fjarlægja saur eftir hund/hunda sína á tryggilegan hátt.
- Eigi er leyfilegt að fara með hunda inn í sjúkra- og skólahús, matvöruverslanir eða aðra staði, þar sem matvæli eru um hönd höfð .
- Leyfi fyrir einstökum hundum er jafnan háð því, að þeir raski ekki ró íbúa hreppsins og séu þeim né öðrum, sem um hreppinn fara, til óþæginda.
- Hundaeiganda ber að tilkynna skrifstofu sveitarfélagsins um aðsetursskipti og ef hundurinn drepst.

3. gr.

Gjald fyrir hundahald.

Hundaeigendur skulu árlega greiða sveitarsjóði gjald til að standa straum af skráningu og eftirliti með hundahaldi. Sá sem á fleiri en einn hund skal greiða gjald af hverjum hundi fyrir sig. Sveitarstjórn ákveður að fenginni umsögn heilbrigðisnefndar, upphæð gjaldsins, og nánara fyrirkomulag gjalddöku, í sérstakri gjaldskrá. Ábyrgðartrygging skal vera innifalin í árlegu gjaldi. Gjaldið skal greitt í fyrsta sinn við skráningu hundsins og síðan fyrirfram árlega með gjalddaga 1. janúar ár hvert. Hafi gjaldið eigi verið greitt innan tveggja mánaða frá gjalddaga fellur leyfið úr gildi.

Skráðum bændum, sem búa á lögbylum í sveitarfélaginu, er heimilt að halda hunda án gjalds og einnig er leyfilegt að skrá viðurkennda veiðihunda án gjalds. Að öðru leiti gilda ákvæði samþykktanna um þá.



4. gr.

Almennt um skyldur hundaeigenda.

Hundaeiganda ber að sjá til þess að hundur hans sæti ekki illri meðferð. Hundur skal að jafnaði hýstur á þeim stað þar sem hann er skráður. Óheimilt er að halda hund þar sem enginn býr. Hundar skulu færðir til hreinsunar ár hvert. Fylgja ber ákvæðum reglugerðar um varnir gegn sullaveiki við hreinsun þeirra. Vanræksla á að láta hreinsa hund eða skila hreinsunartorði leiðir til þess að leyfi til að halda téðan hund fellur úr gildi.

5. gr.

Hundahald í fjöleignarhúsum.

Um hundahald í fjöleignarhúsi gilda ákvæði laga um fjöleignarhús, nr. 26/1994, með síðari breytingum.

6. gr.

Takmörkun á hundahaldi.

Sveitarstjórn getur, að fengnum tillögum heilbrigðisnefndar, ákveðið að veita ekki heimild til hundahalds fyrir ákveðnum hundategundum sem taldar eru hættulegar. Sveitarstjórn getur ákveðið að merkja ákveðin svæði þar sem ekki má vera með hunda. Einnig getur sveitarstjórn ákveðið að láta afmarka ákveðin svæði þar sem má sleppa hundum lausum. Svæði þessi skulu auglýst og kynnt sérstaklega fyrir hundaeigendum. Um aðrar takmarkanir á aðgengi hunda gilda ákvæði heilbrigðisreglugerðar nr. 149/1990, með síðari breytingum og reglugerðar nr. 522/1994.

7. gr.

Eftirlit með hundahaldi.

Starfsmenn sveitarfélagsins og aðilar á þeirra vegum annast eftirlit með hundahaldi. Skulu starfsmenn skrá í dagbók afskipti sín af hundahaldi og veita sveitarstjórn upplýsingar eftir því sem þurfa þykir. Starfsmenn geta leitað aðstoðar lögreglu þegar þörf krefur.

8. gr.

Heimild til að handsama og aflífa hund

Hunda sem ganga lausir utanhúss skal handsama og færa til geymslu. Sama gildir um hættulega hunda og óleyfilega hunda. Kostnaður við töku og geymslu hunda skal að fullu greiddur af eigendum samkvæmt gildandi gjaldskrá. Hættulegum hundum er heimilt að lóga þegar í stað. Aðra hunda er heimilt að afhenda, ef leyfi er framvísað innan 7 daga frá því hundurinn kom í vörslu eftirlitsmanns, enda verði áfallinn kostnaður greiddur. Að öðrum kosti skal hundinum lógað. Sama gildir um aðra hunda sem handsamaðir eru innan hreppsmarkanna og eru frá öðrum sveitarfélögum. Hafi eigandi ástæðu til að ætla að hundur hans sé grimmur eða varasamur skal hann sjá til þess að hundur hans sé ávallt mýldur utan heimilis síns. Hafi hundur bitið mann og/eða er hættulegur getur dýraeftirlitsmaður í samráði við heilbrigðisfulltrúa tekið ákvörðun um að hundur verði aflífaður þegar í stað. Óski hundaeigandi þess er heimilt að leita álits héraðsdýralæknis, áður en ákvörðun um aflífun er tekin. Sveitarstjórn er heimilt, hvenær sem er að afturkalla leyfi fyrir einstökum hundum eða öll leyfi, telji hún þess þörf.



9. gr.
Viðurlög.

Sé um alvarleg eða ítrekuð brot á samþykkt þessari að ræða er heimilt að afturkalla leyfi fyrir einstökum hundum og banna viðkomandi eiganda að vera með hund í sveitarfélaginu um lengri eða skemmri tíma.

Einnig geta brot gegn samþykkt þessari varðað sektum, nema þyngri refsing liggi við að lögum.

Með mál út af brotum á samþykkt þessari eða reglum sem settar eru samkvæmt henni, skal farið sem opinbert mál

10. gr.
Gildistaka

Reglugerð þessi samin og samþykkt af sveitarstjórn staðfestist hér með samkvæmt lögum nr. 12/1969 um hollustuhætti og heilbrigðiseftirlit, til þess að öðlast gildi þegar í stað. Jafnframt fellur úr gildi samþykkt um hundahald frá 9. október 1974.

Umhverfisráðuneytinu 19. janúar 2004.

F.h.r.